

每週經課朗誦經文(巴克禮台語漢字)2015/07/19

共同經課 - 1 撒母耳記下七章一節~十四 a 節

1 當王踣佇厝內，耶和華也已經互伊脫離四圍的對敵，得著安靜的時。2 王給先知拿單講：「看啊，我踣佇柏香柴的厝內，總是上帝的櫃踣佇帳簾內。」3 拿單對王講：「見若你的心所想的通去做，因為耶和華及你佇啲。」4 彼暝，耶和華的話臨到拿單講：5 「你去給我的奴僕大衛講，耶和華按呢講：『你欲起厝互我倚起嗎？6 對我導以色列人出埃及的日到今仔日，我未曾踣佇厝裡，常常行佇布棚及會幕。7 見我及以色列人所行到的所在，豈曾對以色列一支派的士師，就是我命令照顧我的百姓以色列的講：恁啥事無給我起柏香柴的厝啊？』8 「今，你著給我的奴僕大衛，講萬軍的耶和華按呢講：『我對羊鬪(tiâu)中，你啲趁羊群，揀你，做我的百姓以色列的君王。9 你無論去叨落，我常常及你佇啲，佇你的面前剪除你一切的對敵。我的確互你得著大名，親像世上許個偉人的大名一樣。10 我欲為著我的百姓以色列定著一個所在，栽培 in，互 in 踣佇家己的所在，無閣遷徙；兇惡的類無親像早前攪擾 in，11 也無親像對我命令士師管理我的百姓以色列的日。我欲互你脫離一切的對敵，得著安靜，閣耶和華給你講，耶和華欲給你建立家。12 到你的日子已經滿、你及你的列祖相及暝的時，我欲設立你所出的後裔來續接你；我也欲堅固伊的國。13 伊欲為我的名起殿；我欲堅固伊的國位，直到永遠。14 我欲做伊的父，伊欲做我的子。」

共同經課 - 2 詩篇八十九篇二十節~三十七節

20 我尋著我的奴僕大衛，用我的聖油抹伊。21 我的手欲常常及伊佇啲；我的手骨亦欲堅固伊。22 對敵袂會勒索伊；兇惡的人袂會苦楚伊。23 我欲佇伊的面前拍碎伊的對敵，攻擊彼個怨恨伊的人。24 總是我的信實及我的慈愛欲及伊佇啲；因為我的名，伊的角欲得著抬高。25 我欲互伊的手伸到海，正手伸到諸個河。26 伊欲稱呼我講：你是我的父，是我的上帝，是救我的石磐。27 我亦欲設立伊做大子，做世界上第一高的君王。28 我欲為著伊保存我的慈愛，到永遠；我及伊所立的約的確無變換。29 我亦欲保存伊的後裔到代代，互伊的寶座親像天的久。30 設使伊的子孫放揀我的律法，無行我的法度；31 悖謬我的律例，無守我的誠命，32 我就欲用拐仔責罰 in 的過失，用鞭責罰 in 的罪惡。33 總是我的確無將我的慈愛一盡對伊收回，亦的確無互我的信實廢無。34 我的確無失我的約，亦無改換我的嘴所講的。35 我一擺指家己的聖潔來咒誓：我決斷無對大衛講白賊！36 伊的後裔欲傳到永遠；伊的寶座佇我的面前親像日的久長，37 亦親像月的永遠建立，閣親像天頂確實的干證。

共同經課 - 3 以弗所書二章十一節~二十二節

11 所以恁著記得：恁前照肉體做外邦人，互許個稱做割禮的人稱恁做無受割禮；in 的割禮就是對人的手所行佇肉體的。12 彼時，恁無基督，以色列的國無份，佇諸個應允的約無干涉，無所向望，惦佇世間毋識上帝。13 恁平素離開遠遠的，今惦佇基督耶穌，對伊的血，有得著近倚。14 因為伊是做咱的和平，互二旁做一個，拆去彼中間相隔的牆；15 閣佇伊的肉體廢無結冤讎的因端，就是諸個誠命的律法，記載佇規例的，欲佇伊本身將二旁造成一個新的人，來成就和平。16 閣已經佇十字架除去彼個冤讎，欲互二旁佇一體對十字架，及上帝和，17 閣來傳和平互恁遠的人，也傳和平互近的。18 因為對伊咱二旁佇一個神，得著親近父。19 按呢，恁無閣做外面人寄腳的，就是及諸個聖徒像國，做上帝家內的人；20 受起造佇諸個使徒及先知的地基頂，基督耶穌家己做厝角要緊的石，21 在佇伊見若所起的攏相聯絡，惦佇主來漸漸成做聖殿。22 恁也惦佇伊相及受起造，成做上帝用神所倚起的厝。

共同經課 - 4 馬可福音六章三十節~三十四節、五十三節~五十六節

30 使徒聚集就近耶穌，將 in 所行、所教示的攏給伊講。31 耶穌給 in 講：「恁家己及我來去曠野的所在歇暝霎仔久。」因為往來的人多，連食也袂顧得。32 in 就上船，去曠野的所在家己住。33 眾人看見 in 去，有多多人知，就對逐個城步行相及走，代先 in 到。34 耶穌出去，看見歸大陣的人，就憐憫伊，因為 in 親像羊無牧者，才用多多項教示 in。53 過去了，就到革尼撒勒地，船拋佇岸裡，54 已經離開船，人連鞭認得伊，55 遍遍走彼個地方，聽見伊佇甚麼所在，就將舖仔扛病人到遐。56 見若伊所入的鄉社、城市、鄉下，in 將病人下佇街市，求伊若使互 in 摸伊的衫仔裾的鬚；見若摸的人攏得著好。